



Regulativ dalla Biblioteca populara Disentis/Mustér e contuorn

Revisiun parziale

M E S S A D I

dalla suprastonza communalia al cussegli da vischnaunca

Preziada signura presidenta
Preziadas signuras cusseglieras
Prezai signurs cussegliers

La Biblioteca populara Disentis/Mustér e contuorn ei vegnida fundada 1984. Dapi lu eis ella sesviluppada ad in menaschi da gronda impurtonza culturala per la vischnaunca da Mustér ed era per las vischnauncas vischinontas. Quei semuossa primarmein els mieds (cudischs) disponibels, mo era ella cussegliaziun ed el survetsch d'emprést. Il diember total da mieds (cudischs) ei carschius da 4'000 all'entschatta ad oz rodund 15'500. Igl onn 2011 ein 11'200 mieds vegni empristai. Tier la clientella dalla biblioteca settracta ei buca mo da vischinas e vischins da Mustér, mobein era da persunas e famiglias da Tujetsch, Medel e Sumvitg, sco era hospes da vacanzas. Quellas vischnauncas prestan ina contribuziun annuala. Indicaziuns pli detagliadas ein cuntenidas el rapport da gestiun 2011 sin pagina 19 e 20.

Successivamein ein las collaboraturas dalla biblioteca sescoladas e seperfecziunadas. La purschida ed il survetsch offerius oz ei en tuts graus d'emprema qualitat. La Biblioteca populara Disentis/Mustér e contuorn sa secumpareglier cun tuttas outras bibliotecas da vischnaucas dalla medema grondezia el cantun Grischun.

Revisiun parziale

Ils 12 da december 2008 ha il cussegli da vischnaunca approbau ina revisiun dil statut per la biblioteca. Dapi lu ei la professiunalitad aunc s'augmentada. Oz drova ei ina scolaziun permanenta dallas collaboraturas ed in grond engaschment da persunal qualificau. Quella buna lavour sto vegnir indemnisada andantamein e corrispunder pli u meins allas pretensiuns hodiernas. Per saver ademplir quellas pretensiuns drova ei ina pintga revisiun dil regulativ, che duei el futur – conform alla terminologia usitada – buca pli seclamar statut. La midada concernenta (art. 16 dil regulativ revediu) secloma sco suonda:

Indemnisaziun: Sin proposta dalla cumissiun dalla biblioteca relai la suprastanza communalia in reglament per ina indemnisiun adequata dil menader ni dalla menadra sco era dallas collaboraturas e dils collaboraturs dalla biblioteca. Quel sedrezza tenor il regulativ d'indemnisaziun dalla vischnaunca da Mustér, risguardond la situazin specifica.

Sin fundament da quella autorisaziun relai la suprastanza communalia in reglament per l'indemnisaziun. Quel sebasa sil regulativ d'indemnisaziun, ch'il cussegli da vischnaunca ha approbau ils 22 da zercladur 2012 e che passa en vigur cun l'entschatta da schaner 2013.

Per saver contollar las expensas, vegn la summa maximala per las indemnisiuns limitada a frs. 30'000.--. Cunquei che la vischnaunca ei la purtadra dalla biblioteca, vegnan il preventiv ed il quen dalla biblioteca el futur integrai el quen communal. Aschia ha la cumissiun da gestiun ed il cussegli da vischnaunca ina investa. Quei ein las duas sulettas midadas materialas.

La Biblioteca populara Disentis/Mustér e contuorn ei ina impurtonta instituziun culturala. Cun la revisiun parziale dil regulativ vegnan ils fatgs finanzials precisai e la realisaziun dall'incarica levgiada.

Proposta

La suprastanza communalia propona al cussegli da vischnaunca

- d'approbar la revisiun parziale dil regulativ dalla Biblioteca populara Disentis/Mustér e contuorn.

Suprastanza communalia Disentis/Mustér
Il president: Il canzlist:


Dr. Dumeni Columberg


Andri Hendry

Disentis/Mustér, ils 24 da settember 2012

- Sboz dil regulativ revediu